



TITAH DIRAJA

**KEBAWAH DULI YANG MAHA MULIA
SERI PADUKA BAGINDA
YANG DI-PERTUAN AGONG**

SEMPENA

**ISTIADAT PENGURNIAAN DARJAH KEBESARAN,
BINTANG DAN PINGAT WILAYAH PERSEKUTUAN
BAGI TAHUN 2024**

PADA

**19 MAC 2024 MASIHI [SELASA]
BERSAMAAN 8 RAMADHAN 1445 HIJRAH**

**BERTEMPAT DI
ISTANA NEGARA, KUALA LUMPUR**

ASSALAMUALAIKUM WARAHMATULLAHI WABARAKAATUH.

BISMILLAH HIRRAHMAAN NIRRAHIM.

DENGAN NAMA ALLAH, YANG MAHA PEMURAH LAGI MAHA MENGASIHANI. SEGALA PUJI BAGI ALLAH, TUHAN PENTADBIR SELURUH ALAM. SELAWAT DAN SALAM, KEPADA JUNJUNGAN BESAR KITA NABI MUHAMMAD, SEMULIA-MULIA RASUL SERTA KELUARGA DAN PARA SAHABATNYA SEKALIAN.

ALHAMDULILLAH, BERSYUKUR SAYA KE HADRAT ALLAH SUBHANAHU WATA'ALA, KERANA DENGAN LIMPAH KURNIA DAN IZIN-NYA, DAPAT SAYA HADIR KE ISTIADAT PENGURNIAAN DARJAH KEBESARAN, BINTANG DAN PINGAT, SEMPENA SAMBUTAN HARI WILAYAH PERSEKUTUAN BAGI TAHUN 2024.

SAUDARA-SAUDARI SEKALIAN.

TERLEBIH DAHULU SAYA INGIN MERAKAMKAN UCAPAN TERIMA KASIH KEPADA SEMUA PIHAK YANG TELAH BEKERJASAMA MENGANJURKAN MAJLIS PADA HARI INI DAN JUGA PELBAGAI PROGRAM YANG TELAH DIBUAT SEMPENA SAMBUTAN HARI WILAYAH PERSEKUTUAN UNTUK TAHUN 2024.

SEBAGAIMANA SEMUA SEDIA MAKLUM, ISTIADAT KURNIAAN DARJAH INI TIDAK DAPAT DIADAKAN PADA 1 FEBRUARI YANG LALU, KERANA SAYA BAHARU SAHAJA MEMEGANG TAMPUK PEMERINTAHAN NEGARA PADA 31 JANUARI 2024.

OLEH ITU, ISTIADAT HARI INI DIADAKAN SEBERAPA SEGERA SETELAH SAYA DAPAT MENYESUAIKAN DIRI DI ISTANA NEGARA DAN MENELITI SEGALA TUGAS DAN TANGGUNGJAWAB YANG PERLU DILAKSANAKAN.

SUKA SAYA TEGASKAN DI SINI BAHAWA PENGURNIAAN DARJAH KEBESARAN, BINTANG DAN PINGAT WILAYAH PERSEKUTUAN ADALAH UNTUK MEMBERIKAN PENGIKTIRAFAN KEPADA INDIVIDU YANG TELAH BERJASA, MENCURAHKAN KHIDMAT BAKTI ATAU MENYUMBANG KEPADA KEMAJUAN WILAYAH PERSEKUTUAN.

OLEH YANG DEMIKIAN, SAYA SENDIRI TELAH MENELITI SETIAP CALON, YANG DISEDIAKAN OLEH JAWATANKUASA PEMILIHAN DAN PADA TAHUN INI, SAYA TELAH MEMBUAT KEPUTUSAN HANYA 36 ORANG PENERIMA SAHAJA YANG BENAR-BENAR LAYAK UNTUK DIANUGERAHKAN.

TAHNIAH SAYA UCAPKAN KEPADA MEREKA YANG AKAN MENERIMA DARJAH KEBESARAN, BINTANG DAN PINGAT PADA HARI INI. SEMOGA ANUGERAH YANG DIBERIKAN INI, MENJADI PENYUNTIK SEMANGAT UNTUK TERUS MENABUR BAKTI DAN MENJADI CONTOH KEPADA MASYARAKAT.

SAUDARA SAUDARI SEKALIAN,

SETELAH HAMPIR DUA BULAN SAYA TINGGAL DI KUALA LUMPUR INI, APA YANG BOLEH SAYA KATAKAN ADALAH, PEMBANGUNAN EKONOMI DAN INFRASTRUKTUR DI IBU KOTA INI ADALAH SANGAT PESAT BERBANDING BANDAR-BANDAR LAIN DI MALAYSIA.

PEMBANGUNAN EKONOMI DI KUALA LUMPUR DAN PUTRAJAYA, TELAH MEMBUKA BANYAK PELUANG PEKERJAAN DAN MENYEBABKAN PENGHIJRAHAN PENDUDUK DARI NEGERI-NEGERI KE KAWASAN WILAYAH PERSEKUTUAN.

OLEH SEBAB ITU, KERAJAAN TERPAKSA MEMBANGUNKAN INFRASTRUKTUR AWAM YANG LEBIH CEKAP UNTUK MENGATASI KESESAKAN JALAN RAYA DAN MEMENUHI KEPERLUAN PENDUDUK BANDARAYA YANG SEMAKIN PADAT.

PERSOALANNYA, ADAKAH KERANA WILAYAH INI DITADBIR SECARA TERUS OLEH KERAJAAN PERSEKUTUAN, BANYAK PERUNTUKAN PEMBANGUNAN DITUMPUKAN KEPADA 3 WILAYAH INI SAHAJA?

SAYA HARAP SEMUA BANDAR DI 13 NEGERI YANG LAIN JUGA MESTILAH DIBERIKAN PERHATIAN DAN PERUNTUKAN YANG ADA DIBAHAGIKAN SECARA SAKSAMA SUPAYA PEMBANGUNAN YANG SEIMBANG DAPAT DICAPAI DI SELURUH NEGARA.

IBARAT PEPATAH MELAYU ADA MENYEBUT: "HATI GAJAH SAMA DILAPAH, HATI KUMAN SAMA DICICAH"

SEKIRANYA SEMUA NEGERI DIBANGUNKAN BERSAMA, PENGIJRAHAN PENDUDUK KE PUSAT BANDARAYA AKAN DAPAT DIKURANGKAN DAN KESESAKAN JALAN RAYA AKAN LEBIH TERKAWAL.

SAUDARA-SAUDARI SEKALIAN,

SEMUA ORANG TAHU YANG SAYA SUKA MEMANDU SENDIRI KERETA SAYA. JADI SAYA DAPAT LIHAT DENGAN JELAS KEADAAN JALAN RAYA DAN KAWASAN SEKITARNYA. APA YANG SAYA NAMPAK, MASIH ADA BEBERAPA TEMPAT DI KUALA LUMPUR INI YANG KOTOR DAN TIDAK DISELENGGARA DENGAN BAIK.

OLEH ITU SAYA MENYERU, DEWAN BANDARAYA KUALA LUMPUR AGAR SENTIASA MEMANTAU DAN MENGAMBIL TINDAKAN UNTUK MENINGKATKAN TAHAP KEBERSIHAN BANDARAYA. AWAK SEMUA ADA BANYAK KAKITANGAN YANG LALU-LALANG DI DALAM BANDAR, MUSTAHIL TIDAK NAMPAK KAWASAN YANG KOTOR. JANGANLAH TUNGGU SAMPAI SAYA TEGUR.

MASYARAKAT KOTA JUGA DIGESA UNTUK SAMA-SAMA MENJAGA KEBERSIHAN DAN ALAM SEKITAR. JANGAN MEMBUANG SAMPAH MERATA-RATA ATAU MENJADIKAN LONGKANG DAN SUNGAI SEBAGAI TEMPAT PEMBUANGAN SAMPAH.

SAUDARA SAUDARI SEKALIAN,

KURANG DARI 2 MINGGU LAGI, AKAN GENAPLAH DUA BULAN, SAYA MEMEGANG TAMPUK KETUA NEGARA. APABILA HABIS TEMPOH BULAN MADU INI, SAYA AKAN MULAKAN CARA PEMERINTAHAN SAYA YANG SEBENAR.

INGIN SAYA TEGASKAN, YANG SAYA AKAN MEMIKUL AMANAH RAJA-RAJA MELAYU UNTUK MENJAGA KEPENTINGAN RAKYAT DAN NEGARA. SAYA BUKAN PATUNG UNTUK DISEMBAH, ATAU DIJADIKAN PERHIASAN

DI DALAM MAJLIS, ATAU DIPAKSA MENGIKUT SEGALA KATA DAN KEHENDAK MENTERI.

SAUDARA-SAUDARI SEKALIAN.

BERSEMPENA BULAN RAMADHAN YANG PENUH KEBERKATAN INI, SAYA INGIN MENGAMBIL KESEMPATAN UNTUK MENGUCAPKAN SELAMAT BERPUASA KEPADA SELURUH UMAT ISLAM.

SAYA JUGA INGIN BERPESAN, APABILA BERBELANJA UNTUK JUADAH BERBUKA PUASA DAN KETIKA MEMBUAT PERSIAPAN UNTUK HARI RAYA KELAK, JANGANLAH MEMBAZIR KERANA PEMBAZIRAN ITU ADALAH SIFAT KEJI, YANG AKAN MENCACATKAN KEBERKATAN BULAN RAMADHAN.

AKHIR KATA, MARILAH KITA BERDOA, SEMOGA WILAYAH PERSEKUTUAN DAN NEGARA MALAYSIA, SENTIASA BERADA DALAM KEADAAN SELAMAT, MAJU DAN MAKMUR SERTA SELURUH RAKYATNYA HIDUP BERSATU PADU, AMAN DAN SENTOSA.

SEKIAN.

WABILLAHIT TAUFIK WAL HIDAYAH,
WASSALAMUALAIKUM WARAHMATULLAHI WABARAKAATUH.